

ꦲꦶꦒꦲꦮꦶꦒ

ꦢꦺꦱꦩꦠꦱꦺꦱꦺꦠꦤ꧀

ꦏꦺꦝꦢꦺꦤ꧀ꦱꦺꦠꦤ꧀



**AWIG-AWIG  
DESA ADAT SESETAN  
KEC. DENPASAR SELATAN  
KOTA DENPASAAR**



នីយសាមុទ្រនៃក្រសួងយុត្តិធម៌  
និងសិប្បកម្មសង្គម

**NIYASA DESA ADAT SESETAN**

## PITEGES NIYASA

1. Bintang : Maka lambang Desa Pakraman Sesetan percaya ring Ida Sang Hyang Widhi Wasa.
2. Segi Lima : Maka lambang dasar negara Pancasila sane madaging lima sila.
3. Candi Bentar : Maka lambang silih sinunggil ciri budaya Bali
4. Padi – Kapas : Maka lambang kawibuhan Desa Pakraman Sesetan.
5. Patung Gajah : Maka lambang kawentenan sane nyata ring Desa Pakraman Sesetan.
6. Paiketan Padi lan Kapas : Maka lambang paiketan banjar-banjar sane wenten ring Desa Pakraman Sesetan, sane kaepah dados 5 banjar panyatusan.
7. Mamed-medan : Maka lambang budaya khas lan sakral, sane kalaksanayang nyabran warsa, ritatkala hari raya Nyepi ring Desa Pakraman Sesetan.
8. Sesetan : Desa Pakraman Sesetan.
9. Warna Pelung : Maka lambang Desa Pakraman Sesetan sane kertha, tentrem lan ajeg.

## PIDAGING CAKEPAN AWIG-AWIG

PITEGES NIYASA .....	1
PIDAGING CAKEPAN AWIG-AWIG.....	2
MURDHA CITTA.....	1
Prathamas sargah ARAN LAN WEWIDANGAN DESA.....	1
Dwitiyas sargah PETTIS LAN PAMIKUKUH.....	1
Trëtyas sargah SUKERTA TATA PAKRAMAN.....	2
Palet 1. Indik Krama .....	2
Palet 2. Prajuru Desa.....	4
Palet 3. Indik Gendongan / Kulkul .....	6
Palet 4. Indik Paruman .....	8
Palet 5. Indik Druen Desa.....	9
Palet 6. Sukerta Pamitegep.....	11
Kaping 1. Karang lan Tegal .....	11
Kaping 2. Pepayonan .....	12
Kaping 3. Wewangunan.....	12
Kaping 4. Wewalungan.....	13
Kaping 5. Bhaya.....	14
Kaping 6. Panyanggran Banjar.....	15
Caturthas sargah SUKERTA TATA AGAMA.....	15
Palet 1. Indik Dewa Yadnya.....	15
Palet 2. INDIK RESI YADNYA.....	23
Palet 3. Indik Pitra Yadnya.....	23
Palet 4. INDIK MANUSA YADNYA .....	27
Palet 5. INDIK BUTHA YADNYA.....	28
Pancamas sargah SUKERTA TATA PAWONGAN.....	31
Palet 1. INDIK PAWIWAHAN .....	31
Palet 2. INDIK NYAPLAN.....	33
Palet 3. INDIK SENTANA.....	34
Palet 4. INDIK WARISAN.....	36
Sat sargah WICARA LAN PAMIDANDA .....	38
Palet 1. INDIK WICARA .....	38
Palet 2. INDIK PAMIDANDA .....	39
Saptamas sargah NGUWAH NGUWUHIN AWIG-AWIG.....	40
Astamas sargah SAMAPTA / PAMUPUT .....	40

## MURDHA CITTA

Om Swastyastu,

Om Awighnamastu nama siddham,

Malarapan saking kawinongangning Ida Hyang Widhi Wasa asung kerta nugraha ngwentenang kahuripan sekala niskala ring bhuwana agung lan bhuwana alit. Manut dresta desane wantah pawakan pasayuban Krama Desa rauhing kula warga pawongannia. Desane kaanggehang bhuwana agung, pawongannya soang-soang pinaka bhuwana alit.

Sotaning bhuwana agung, desane wantah pawakan bhuwana maurip jangkep saha Tri Hita Karana, luire :

1. Parhyangan, sahananing kahyangan, panyiwian desa, genah ngarcana Ida Hyang Parama Wisesa maka jiwana desane.
2. Pawongan, krama saha warga desa maka sami mapawakan bayu premana, mawinan desane sida molah maprawerti.
3. Palemahan, tanah kekuwuban desa sinanggeh stulan desane.

Adung patemon bhuwana kalih, larapan santa jagadhita, sinanggeh murdhaning prayojana pangriptaning awig-awig Desa Pakraman ring paseban saha krama desa adat.

Pinaka sepat siku-siku pamatut, wastu prasida prayojanan mami kabeh prasama angidep muwah amagehaken kadi linging awig-awig iki.

Om Śāntih, Śāntih, Śāntih Om.

PRATHAMAS SARGAH  
**ARAN LAN WEWIDANGAN DESA**

Pawos 1

- (1) Desa adat puniki mawasta Desa Adat Sesetan.
- (2) Jebar kekuwub wewidangan mawates nyatur desa antuk:
  - ha. Sisi kangin antuk Desa Adat Panjer lan Desa Adat Sidakarya.
  - na. Sisi kelod antuk Desa Adat Serangan.
  - ca. Sisi kauh antuk Desa Adat Pedungan.
  - ra. Sisi kaler antuk Desa Dauh Puri.
- (3) Desa Adat Sesetan puniki kepah dados 9 (sia) banjar:
  - ha. Banjar Kaja.
  - na. Banjar Tengah.
  - ca. Banjar Pembungan.
  - ra. Banjar Gaduh.
  - ka. Banjar Lantang Bejuh.
  - da. Banjar Dukuh Sari.
  - ta. Banjar Pegok.
  - sa. Banjar Suwung Batan Kendal.
  - wa. Banjar Puri Agung.

DWITĪYAS SARGAH  
**PETITIS LAN PAMIKUKUH**

Pawos 2

Desa Adat Sesetan ngamanggehang pamikukuh minakadi: Panca Śradha, Pancasila, Undang-Undang Dasar 1945, Tri Hita Karana.

### Pawos 3

- (1) Luwir petitis Desa Adat Sesetan puniki mikukuhin miwah ngajegang sahananing sastra agama:
  - ha. Nginggilang tata prawertining magama.
  - na. Ngajegang kasukertan desa saha pawongannyane sami sekala lan niskala.
  - ca. Ngajegang tata sangaskaraning pawongan pamekas sane ngiket pakulawargan.
  - ra. Ngajegang kasukertan saraja druen desa miwah druening pawongan sami.

### TRĒTYAS SARGAH

## SUKERTA TATA PAKRAMAN

### PALET 1

### Indik Krama

### Pawos 4

- (1) Sane kabaos krama Desa Adat Sesetan inggih punika kulawarga sane magama Hindu tur ngranjing mabanjar adat ring wewidangan Desa Adat Sesetan.
- (2) Sajaba punika sinanggeh tamiu, sane kabinayang dados kalih inggih punika sane magama Hindu, miwah siosan ring magama Hindu.

### Pawos 5

- (1) Krama desa adat ngarep, inggih punika kulawarga sane magama Hindu wit pastika jenek mapaumahan lan sane kantun jejer makrama banjar ring wewidangan Desa Adat Sesetan tur sampun saking nguni nyungsung tetegenan Kahyangan Tiga Desa Adat Sesetan.
- (2) Krama desa adat pangele, inggih punika krama ngarep sane sampun kagentosin antuk sentanannyane tedun makrama desa ngarep.
- (3) Krama desa adat patus, inggih punika:

- ha. Krama balu lanang utawi istri nenten maderbe sentana.
- na. Krama balu lanang utawi istri, pianaknyane durung alaki rabi.

#### Pawos 6

Ngawit dados krama Desa Adat Sesetan inggih punika ngawit kulawarga tedun mabanjar adat ring wewidangan Desa Adat Sesetan.

#### Pawos 7

- (1) Swadharman krama ngarep keni urunan miwah ayahan mamungkul.
- (2) Swadharman krama pangele. tur krama patus keni ayahan ngrombo krama ngarep.

#### Pawos 8

- (1) Krama tamiu patut naur iuran saha madana punia ring desa adat utawi banjar, manut pararem.
- (2) Krama tamiu patut polih petias marupa pitulung ring sajeroning katiben pancabaya.

#### Pawos 9

- (1) Wusan dados krama desa, luire:
  - ha. Sangkaning pinunas ngraga, menawi kesah ka dura desa.
  - na. Kanorayang duaning sampun tan prasida ngeihin solah maprawerti satata mamurug kecaping awig-awig.
- (2) Sang wusan makrama:
  - ha. Tan polih pah-pahan druen desa utawi druen banjar.
  - na. Tan polih pasayuban sajeroning ala ayu.

## Pawos 10

- (1) Prade wenten jadma / warga / krama Desa Adat Sesetan ngametuang wiadin nglaksanayang haro-hara (punyah, nganggen tur ngadol narkoba) ring wewidangan Desa Adat Sesetan patut sang inucap kakantenang ring sang rumawos saha katiben pamidanda manut pararem.
- (2) Yening wenten jadma saking dura desa ngametuang wiadin nglaksanayang haro-hara ring wewidangan Desa Adat Sesetan, patut sang inucap kakantenang ring sang rumawos saha katiben pamidanda katundung saking wewidangan Desa Adat Sesetan.

## PALET 2

### Prajuru Desa

## Pawos 11

- (1). Desa Adat Sesetan kawawa olih Bendesa Adat kawantu olih Patajuh, Panyarikan, lan Patengen.
- (2). Bendesa Adat, kadegang olih Paruman Desa.
- (3). Sane wenang kapilih dados prajuru desa inggih punika krama sane mawiwit saking Desa Adat Sesetan, uning ring aksara, sima lan dresta.
- (4). Ring sajeroning ngadegang Bendesa Adat soang-soang banjar ngamedalang calon adiri sane pacang kadegang dados Bendesa Adat.
- (5). Patajuh, Panyarikan, Patengen kasudi olih Bendesa Adat.

## Pawos 12

- (1) Bendesa Adat kapilih antuk Paruman Desa nyabran 5 (limang) warsa.
- (2) Bendesa Adat, Patajuh, Panyarikan, lan Patengen kadegang wates senger nyane 5 (limang) warsa, nanging dados kasudi tur kadegang malih apisan kewannten.

### Pawos 13

- (1) Sane tan dados kadegang Bendesa Adat:
  - ha. Sang ceda angga.
  - na. Sang kageringan minakadi sungkan ila, ayan.
  - ca. Sang sane maderbe kasucian urip tan patut.
  - ra. Sang sapisira ugi sane tan kapatutang manut pararem.
- (2) Bendesa Adat kagentosin antuk pararem desa yan kawentenannyane sakadi ring sor:
  - ha. Sampun tutug sengkernyane.
  - na. Sampun seda / padem.
  - ca. Saking pinunas ngraga tur malarapan kageringan, muah sane siosan.
  - ra. Nilar sesananing Bendesa Adat utawi nglaksanayang asta dusta.

### Pawos 14

- (1) Sajeroning ngenterang kasukertan niskala prajuru desa mingsinggihang pamangku Kahyangan Desa.
- (2) Prajuru desa ritatkala ngamargiang swadharmannyane kawantu olih sabha desa.
- (3) Sabha Desa ngicen piteket-piteket majeng ring prajuru desa.
- (4) Ritatkala prajuru desa ngamargiang peparuman mangda nyarengang Sabha Desa.
- (5) Sabha Desa inggih punika soang-soang Kelihan Banjar lan utusan soang-soang banjar pinih akeh tigang (3) diri.

### Pawos 15

- (1) Swadarmaning Bendesa Adat luire:
  - ha. Ngenterang paruman.
  - na. Ngenterang panglaksanaan sadaging awig-awig miwah pamutus paruman.
  - ca. Ngenterang saha ngatur tatane ngangge saraja brana druen Desa miwah banjar.

- ra. Nuntun tur ngenterang krama rauhing warga desa ngupadi kasukertan sekala niskala.
  - ka. Nuntun saha nyaksinin tatacara miwah sangaskaraning pawongan sane manut sulur pakulawargan.
  - da. Nuntun saha ngenterang krama desa miwah banjar ngupadi nginggilang sahanan sastra agama, kasucian kahyangan, kasucian pawongan, kasucian palemahan manut tatacaraning ngangge setra.
  - ta. Maosin kalih niwakang pamutus marep ring wicara warga desane.
  - sa. Ngwakilin desa ngwetuang baos ring sapa sira ugi, miwah sane siosan manut sasana.
- (2) Tatacaraning nglaksanayang sarwa swadarma ring ajeng tan maren patut anut ring awig-awig, pararem-pararem, dresta miwah pamutus paruman desa.
  - (3) Panglaksanannyane ring ajeng patut kasiarang ring paruman desa utawi banjar.
  - (4) Bendesa Adat sangketa natak pamutus paruman desa.

#### Pawos 16

Petias utawi olih-olihan prajuru desa luire; luput rerampen (pepeson), polih tanding tengah, upon pacatu utawi palaba carik utawi tegal druen desa, wastra saparadeg a warsa sapisan, lan petias siosan manut pararem.

#### PALET 3

### **Indik Gendongan / Kulkul**

#### Pawos 17

- (1) Tabuh gendongan desa ngarep ring saluiring karyan krama miwah upakara yadnya jeg nglambat ping kalih ping kalih ping dasa.
- (2) Tabuh kulkul banjar nganutin tetujon luih ipun;

- ha. Tengeran risedeng ngaturang pujawali, suaran gendongan ping enem dasa nglambat.
- na. Tengeran suaran gendongan ring banjar wiadin ring desa, minakadi wenten pituduh ring guru wisesa taler kalaksanayang.
- ca. Risedek palelawatan Ida Bhatara tedun ngiderin panggungan suaran gendongan ping seket nglambat.

#### Pawos 18

- (1) Suaran gendongan ring banjar-banjar taler nganutin tata cara:
  - ha. Suaran gendongan saluiring ngarep karya, ngawit ping lima, ngumbang ping lima, pamada ping lima.
  - na. Suaran gendongan kapatian nglambat ping tiga.
  - ca. Suaran gendongan tutug tigang rahina sang kapatian, ngawit ping pat, nglambat ping pat, pamada ping pat.
  - ra. Suaran gendongan wong ical, ngawit ping lima, ping lima, ping pat nglambat.
  - ka. Suaran gendongan kaduracaran, ping kalih, ping kalih nglantur.
  - da. Suaran gendongan ngamuk, bulus ping sia tigang tulud.
  - ta. Suaran gendongan kadurmenggalan, bulus nglantur.
- (2) Gendongan tan dados katopak yan tan wenten pituduh prajuru sajawaning wenten kapancabhaya.
- (3) Sapa sira sane mamurug patut katiwakin pamidanda, agung alit manut pararem.

#### Pawos 19

- (1) Sapa sira ugi krama desa sane katiban pancabhaya patut katepakang gendongan.  
Tengeran gendongan puniki patut kasambung sinambung tur sami mangda siaga nyadia matetlung:
  - ha. Yan anak ngamuk.
  - na. Yan anak kaduracaran patut katurang ring sang ngawawenang.

- ca. Yan kadurmenggalan / kapuunan gumanti telas umahnyane aleban, krama banjar sane katiben pancabhaya punika patut kawehin pasayuban, parantenan asiki miwah paturon asiki.

#### PALET 4

### Indik Paruman

#### Pawos 20

(1). Paruman ring desa Adat:

- ha. Paruman Desa Paripurna, inggih punika paruman desa sane swadarmanyane nguwah-nguwuhin awig-awig desa adat, ngadegang saha ngentosin Bendesa Adat, Ketua LPD. lan Kepala Pasar.
- na. Pamilet Paruman Desa Paripurna, inggih punika soang-soang Kelihan Banjar, Pamangku Kahyangan Tiga, Pamangku Prasanak, Ketua LPD, Kepala Pasar, Kelian Pacalang lan utusan soang-soang banjar akehnyane limang (5) diri.
- ca. Paruman Desa patut nglaksanayang paruman yening wenten wicara sane mabuat pisan ring sajeroning desa adat.
- ra. Paruman Desa patut kalaksanayang sekirang-kirangnyane nyabran warsa apisan, nunas atur prawerti (laporan) Bendesa Adat.
- ka. Paruman Prajuru Desa.
- da. Paruman Banjar.

(2) Sahanan paruman sida kalaksanayang yan gendongan sampun kasuarayang, ping kalih prajuru miwah krama tegep rauh.

(3) Sahanan pamutus kautsahayang pisan mangda malarapan antuk gilik saguluk, suara sane maakehan sinanggeh pamutus wiadin sah.

- (4) Prade daging paruman tan kacumponin, mangda prajuru desa utawi banjar ngilikang bawos, saha putusannya mangda kararemin antuk krama desa utawi banjar, malih prade tan prasida kasungkemin jantos ping tiga, prajuru desa utawi banjar dados nunas bawos ring sabha desa manut dudonan luire: kamanggala paingkupan prajuru, ngraris panglingsir, panguntat paruman malih.
- (5) Sahanan paruman kariinin antuk ngarcana ring Ida Bhagawan Panyarikan.

#### Pawos 21

- (1) Sajeroning paruman desa, Bendesa Adat patut nyiarang pamargin ngenterang desa, pamekas ngeninin indik:
  - ha. Munjuk lungsuring pakraman saha ayah-ayah, sulur arta berana, druen desa.
  - na. Pidadab prajuru ngeninin utsahan desa kapungkur.
- (2) Pamutus paruman desa sinanggah pararem, maka pamitegep pamargin awig-awig.

#### Pawos 22

- (1) Sangkepan prajuru desa ngwedarang rerincikan utsahan desa kapungkur.
- (2) Sangkepan prajuru desa tan dados ngamedalang tetegenan ring krama sadereng kaingkupin antuk krama desa.
- (3) Pamutus sangkepan prajuru desa ngwetuang paswara maka daging pituduh sang ngawawenang utawi ngonekang pecak pararem krama desa.

#### PALET 5

### **Indik Druen Desa**

#### Pawos 23

- (1) Padruen Desa Adat Sesetan sakadi ring sor:
  - ha. Kahyangan desa luire: Kahyangan Tiga, parhyangan druen desa siosan.
  - na. Pasar.

- ca. Setra.
- ra. Palawatan Ida Bhatara.
- ka. Pasantian Widya Sabha.
- da. Lembaga Perkreditan Desa (LPD).
- ta. Cagar Budaya (Arca) ring jaba Pura Puseh, Lambang Desa, Kober  
Desa.
- sa. Pacalang.

(2) Olih-Olihan Desa Adat Sesetan luire:

- ha. Urunan krama desa adat.
- na. LPD.
- ca. Pasar.
- ra. Paica saking Guru Wisesa.
- ka. Dana punia tiosan sane patut.
- da. Dana usaha.

Pawos 24

- (1) Prajuru desa patut ngetangang olih-olihan desa sakadi Pawos 23 (2) inucap lan sapanunggalan druen desa.
- (2) Olih-olihan inucap kaanggen prabea piodalan saha wewangunan ring pura miwah anggen kabuatan desa adat.
- (3) Ring sangkepan desa, prajuru pangamong druen desa ngwentenang parindikan munjuk lungsuring padruen desa ring krama desa.
- (4) Sakaluiring drue desa patut wenten ilikitannyane.
- (5) Tan kalugra ngadol utawi ngesahang padruen desa yan tan kasungkemin antuk krama desa.

PALET 6

**Sukerta Pamitegép**

Kaping 1

**Karang lan Tegal**

Pawos 25

- (1) Karang lan tegal krama desa patut kawatesin antuk pagehan/turus utawi tembok mangda pakantenannya asri.
- (2) Wates sisi kaler miwah kangin patut kakaryanin antuk sang ngamong karang ayahan inucap, sane mawasta gegaleng kaluan, sejawaning tanah pecatu, tegal, carik utawi tanah padruean ngraga, sane kapiara watase sisi klod miwah kauh, reh punika mawasta gegaleng kateben.
- (3) Prade karasayang pagehan utawi turus inucap nglikadin, yan panyandinge pada arsa, kengin watese ngangge pinget kewanen kasaksi antuk Prajuru Desa utawi prasihna pal saking Badan Pertanahan Negara (BPN).
- (4) Prade wenten karang kabebeng mangda kautsahayang wenten marginnyane.
- (5) Tlajakan ring wewidangan Desa Adat Sasetan tan kawenangang anggen madolan utawi usaha-usaha sane siosan.

Pawos 26

- (1) Sinalih tunggil krama desa / banjar tan kalugra;
  - ha. Ngalah-alah margi.
  - na. Ngalah-alah tanah tegak Kahyangan, Setra lan sakancan tegak sinanggeh suci.
- (2) Prade wenten sakadi ring ajeng, sang ngalalah patut keni pamidanda manut perarem.

## Kaping 2

### Pepayonan

#### Pawos 27

- (1) Ngawit nandur pepayonan tanem tuwuh patut adepa agung ngajeroang saking wates, prade jantos ngliwat wates wenang kasepat gantungin.
- (2) Yening wenten papayonan ngungkulin, samaliha mawastu mayanin kapisaga patut kawarah antuk paiguman, ping ajeng prasida sang nruenang wit ngrebah utawi notor.
- (3) Prade sampun kawarah taler tan wenten usaha sang nruenang wit, sang rumasa katetehan / kajerihan wenang masadok ring prajuru, tur risampun kaparitas kalugra ngicalang wit inucap.
- (4) Sang keni pamidanda panyangskara saha prabeya manut pararem marep ring wewangunan sang karubuhan luire:
  - ha. Sang nruenang wit sinanggeh mayanin, prade pungkut ngrubuhin wewangunan krama tios.
  - na. Sang notor, munggul utawi ngrebah taru tur ngrubuhin wewangunan krama tios.
- (5) Krama desa patut ngamanggehang kawerdian tanem tuwuh sane ngawinang desane asri tur lestari.

## Kaping 3

### Wewangunan

#### Pawos 28

- (1) Nyabran ngwangun patut:
  - ha. Masadok ring prajuru, ping ajeng prade wewangunan ngeninin wates.
  - na. Ngangge asta bhumi miwah gegulak kosala-kosali sanistane manut petitis niskala.

- ca. Tan nyayubin ka pisaga.
  - ra. Tan dados ngembahang toya ka pisaga.
- (2) Prade wewangunan jantos nyayubin bilih-bilih temboke ring telenging wates, risampun kawara tur kasadokang ring prajuru, wenang kadanda manut pararem, saha tembok inucap kagubar utawi sanistane mangda kakaryanang abangan.

#### Kaping 4

### Wewalungan

#### Pawos 29

- (1) Sahananing warga desa sane miara wewalungan (bawi risampun mabelas utawi banteng sampun masaluk tali), patut sayaga nitenin negul / nglogor mangda tan ngrusak karang utawi pabianan krama sios, bilih-bilih jantos ngranjing ngletehin kahyangan.
- (2) Prade wenten wewalungan malubar utawi ngeleb ngrusak karang / pabianan krama sios, risampun kawara kengin kataban tur kadanda ngwaliang wit sane karusak saha nawur panebas pepiaran tetaban anut panglokikan prajuru desa.
- (3) Prade jantos ngletehin tegak suci minakadi pamrajan (Sanggah Kemulan), risampun kaparitas antuk prajuru wenang sang nruenang wewalungan kadanda mabuhu agung tebasan prayascita, durmanggala. Utawi Panca Sata iwak bebek belang kalung prade jantos ngletehin Kahyangan Tiga utawi Pura Pamaksan.
- (4) Krama desa patut nyrayanin wewalungan miwah sarwa prani. Nenten kapatutang maboros paksi miwah nuba ulam lan siosan punika.

## Kaping 5

### Bhaya

#### Pawos 30

- (1) Parindikan bhaya luire: jiwa bhaya, artha bhaya (kapandangan), geni bhaya, toya bhaya, ripu bhaya, duracara ring agama.
- (2) Sang manggihin kahanan panca bhaya, patut nepak kulkul bulus mapitulung manut Pawos 18 (1) aksara da.
- (3) Prade ring desa kahanan jiwa bhaya, patut desane ngwentenang Bhuta Yadnya tur sang mayanin katur ring sang ngawewenang.
- (4) Prade wenten jadma mamisuh utawi nguman-uman jatma tios, kakeninin pamidanda beya pacamil tebasan pamrayascita.

#### Pawos 31

- (1) Sang manggihin kahanan artha bhaya (kapandangan), patut ngulkul mapitulung anut ring Pawos 17 (1) aksara da, utawi sang kamalingan atur supeksa ring prajuru utawi dulun desa sane pacang nandanin saha mawuwuh panyangaskara prade wenten jadma ngamaling barang sinanggeh suci.
- (2) Pratingkahe mapailon ring dusta kabawos ngukubin corah, utawi prade wenten jadma manggihin maling tan nyadokang ring prajuru jantos jadma sios nyaduang, patut kadanda kadi dandaning maling, sakueh pangargan wit manut cacakan, tur prade jantos ping tiga malaksana asapunika wenang kasukserah ring sang ngawewenang.
- (3) Prade wenten jadma ngrereh reramon, minakadi daun kelapa, ron miwah sane siosan tan pasadok ring sang nuenang, prade kacunduk (katara) patut kadanda kadi dandaning maling.
- (4) Yening wenten jadma ngranjingin pakubon wiadin pakarangan anak sios rikala suwung tur tanpawangsit mawastu sang madrue karang kaicalan wenang jadma inucap dados ...

- kasinanggeh mamaling saha patut madewa saksi ring Pura Desa utawi Bale Agung.
- (5) Mangda tan kasinanggeh manut ring ajeng asing-asing ngranjingin kubon jadma siyos patut:
  - ha. Matengeran suara (makaukan).
  - na. Nyantos sang nruenang karang rauh utawi masadok ring pangapit pinih tampek, maka buatan pangranjinge.
  - ca. Pamedal karangnya kadagingin sawen, maka cihna wenten pangarah rikala suwung.

Kaping 6

**Panyanggran Banjar**

Pawos 32

Krama desa ritatkala duka, patut kasanggra antuk banjar manut pararem.

CATURTHAS SARGAH

**SUKERTA TATA AGAMA**

PALET 1

**Indik Dewa Yadnya**

Pawos 33

- (1) Palinggih Panyiwian Desa Adat Ssetan luire:
  - ha. Kahyangan Tiga: Pura Desa, lan Pura Bale Agung, Pura Puseh, Pura Dalem miwah Pura Kahyangan Cungkup, Pura Mraja Pati, lan Pura Taman Ssetan.
  - na. Pura Panyiwian siosan: Pura Dalem, Pura Kahyangan, Pura Mraja Pati, Pura Taman Batan Kendal.
  - ca. Pura Swagina: Pura Belong, Pura Sarining Danu, Pura Mlanting Ssetan, miwah Pura Mlanting Batan Kendal.

- ra. Tan kawenangang ngaryanang utawi ngingsirang / ngentos palinggih sane wenten ring sajeroning parhyangan druen desa yening nenten polih panyingkrem ring Paruman Desa.
- (2) Rahina piodalan Kahyangan Utawi Panyiwian soang-soang sakadi ring Kahyangan Tiga luire:
- ha. Pura Desa lan Bale Agung, rikalaning Anggara Kliwon Julungwangi.
- na. Pura Puseh rikalaning Anggara Kliwon Tambir.
- ca. Pura Dalem Sesetan, rikalaning Buda Umanis Medangsia, Pura Taman Sesetan, ring Purnamaning Sasih Kadasa..
- ra. Pura Kahyangan Cungkup lan Mraja Pati, rikalaning Soma Kliwon Kuningan (Pamacekan Agung).
- (3) Ring Pura Panyiwian siosan luire;
- ha. Pura Dalem miwah Taman Batan Kendal rikalaning Buda Umanis Medangsia.
- na. Pura Kahyangan miwah Mraja Pati Batan Kendal rikalaning Soma Kliwon Kuningan (Pamacekan Agung).
- ca. Pamagpagan pakuluh Ida Bhatara Sakenan ring Pura Dalem Batan Kendal rikalaning Soma Paing Langkir.
- ra. Malasti / Melis ka segara ring pasisi Suwung Batan Kendal rikalaning Pangelong ping 13 Sasih Kasanga.
- (4) Ring Pura Swagina luire:
- ha. Pura Belong, Pura Sarining Danu, miwah Pura Mlanting Sesetan rikalaning Purnama Kasa.
- na. Pura Mlanting Batan Kendal rikalaning Purnama Kapat.
- (5) Pangaci ring Pura inucap soang-soang manut kecap Sastra Agama, saha kalaksanayang antuk nista, madya, utama nganutin kawentenan lan pararem sakadi ring Pura Kahyangan Tiga:

- ha. Pura Desa, Pura Puseh, miwah Pura Dalem, rikalaning Pujawali ngembak soang-soang kahaturang Pula Gembal muang runtutannyane. Nanging nemoning Pujawali nyepen pangaci sane kangkat ngangge Udel Kuren Bungkulan katut runtutannyane.
  - na. Ring Bale Agung, rikalaning pujawali ngembak kahaturang Udel Kuren bungkulan katut runtutannyane. Nemoning pujawali nyepen kangkat ngangge Udel Kuren Sibakan.
  - ca. Pura Kahyangan Cungkup rikalaning Pujawali ngembak kahaturang Pula Gembal katut runtutannyane. Nanging nemoning pujawali nyepen pangaci sane kangkat ngangge Udel Kuren Bungkulan katut runtutannyane.
  - ra. Pura Mrajapati rikalaning Pujawali ngembak kahaturang Udel Kuren Bungkulan katut runtutannyane. Nemoning Pujawali nyepen kangkat ngangge Udel Kuren Sibakan.
  - ka. Pura Taman Sesetan kahaturang Peras Pangambean.
  - da. Rikalaning malasti / melis Ida Bhatara sami kahaturang Udel Kuren Bungkulan katut runtutannyane saha hidangan.
- (6) Ring Panyiwian siosan:
- ha. Ring Pura Dalem Batan Kendal nyabran piodalan kahaturang Pule Gembal katut runtutannyane.
  - na. Rikalaning pamagpagan Ida Bhatara Pakuluh Sakenan ring Pura Dalem Batan Kendal kahaturang Udel Kuren Bungkulan.
  - ca. Ring Pura Kahyangan Batan Kendal rikalaning pujawali ngembak kahaturang Pula Gembal katut runtutannyane. Nanging nemoning pujawali Nyepen pangaci sane kangkat ngangge Udel Kuren Sibakan.
  - ra. Ring Pura Mrajapati Batan Kendal nyabran Pujawali kahaturang Peras Pangambean ngiring Guru Panyeneng.

- ka. Pura Taman Batan Kendal nyabran pujawali kahaturang Udel Kurenan Sibakan.
- (7) Ring Pura Swagina:
- ha. Pura Belong, Pura Sarining Danu miwah Pura Mlanting Sesetan kahaturang Udel Kurenan Sibakan.
- na. Pura Mlanting Batan Kendal kahaturang Udel Kuren Sibakan.
- (8) Pangemong utawi pangempon soang-soang pura manut dresta miwah pararem ring Pura Kahyangan Tiga;
- ha. Soang-soang Banjar Panyatusan polih giliran ngempon piodalan Pura Kahyangan Tiga, manut genah, taler pamlastian / melis salami tigang warsa utawi nem piodalan ngembak utawi nyepen salanturnyane ngingsir genah manut kaputusan pararem.
- na. Panyatusan Banjar Gaduh polih leluputan ngempon piodalan ring Pura Dalem, Pura Kahyangan Cungkup, Pura Mrajapati, miwah ring Pura Taman Sesetan, sakewanten Banjar Suwung Batan Kendal polih nyanggra upakara rikalaning pamagpagan pakuluh Ida Bhatara Sakenan, nanging prabea upakara kamedalang antuk desa.
- (9) Ring Pura Panyiwian siosan:
- Pura Dalem, Pura Taman, Pura Kahyangan, miwah Pura Mrajapati Batan Kendal kaempon antuk Banjar Suwung Batan Kendal.
- (10) Pura Swagina;
- ha. Pura Belong, Pura Sarining Danu miwah Pura Mlanting Sesetan soang-soang kaemong antuk silih sinunggil wargi banjar sakewanten prabea pangempon pura kamedalin olih desa.
- na. Pura Mlanting Batan Kendal kaempon antuk Banjar Suwung Batan Kendal.
- (11) Rikalaning kalaksanayang Caru Nangluk Mrana nemoning Tilem Kenem krama panyanggra upakara ring soang-soang wates catus pataning desa, inggih punika:

- ha. Ring wates kangin catus pataning desa, kasanggra olih panyatusan Banjar Pegok.
  - na. Ring wates kelod catus pataning desa, kasanggra olih panyatusan Banjar Gaduh.
  - ca. Ring wates kauh catus pataning desa, kasanggra olih panyatusan Banjar Lantang Bejuh.
  - ra. Ring wates kaja catus pataning desa, kasanggra olih panyatusan Banjar Kaja.
  - ka. Ring madia catus pataning desa, kasanggra olih panyatusan Banjar Tengah
- (12) Palelungaan palawatan Ida Bhatara:
- ha. Nuju pujawali Ida Bhatara ring Pura Kahyangan Tiga, palelawatan Ida Bhatara Presanak sami sawengkon desa Sesetan mangda kaaturan lunga.
  - na. Rikalaning Pujawali Ida Bhatara ring Pura Dalem, Pura Kahyangan, Pura Mrajapati, muah Pura Taman Sesetan, palelawatan Ida Bhatara Pura Dalem miwah Ida Bhatara Kahyangan Batan Kendal kalugra nenten kalungayang.
- (13) Rikala mendak Pakuluh Ida Bhatara Sakenan sane malinggih ring Pura Dalem Batan Kendal, Pralingga Ida Bhatara sami, sapunika taler palelawatan Ida Bhatara Presanak sami mangda kaaturan lunga ring Pura Dalem Batan Kendal.
- (14) Rikalaning caru Nangluk Mrana kalaksanayang, nemoning Tilem Kenem palelawatan Ida Bhatara sane kasiwi antuk krama sane polih nyanggra upakara ring soang-soang wates catus pataning desa mangda kaaturan lunga maintar ngaksinin indik pamargin carune.
- (15) Rikala Ida Bhatara kaaturan Malasti / Melis, Pralingga Ida Bhatara sami, ring Kahyangan Tiga, sapunika taler palelawatan Ida Bhatara Presanak sami mangda kahaturan lunga Melasti ring pasisi Suwung Batan Kendal. Ring pamargine budal palelawatan Ida Bhatara kaaturan Nyejer ring Pura Bale Agung Sesetan.

Pawos 34

- (1) Ring Soang-soang pura inucap kawentenang Pamangku.
- (2) Ngadegang Pamangku manut dedudonan:
  - ha. Turunan utawi ngwaris (pretisentana sane kaselang Widhi).
  - na. Nyanjan utawi nuwur, mapiteges mapinunas ring ajeng panataran pura.
  - ca. Kapilih olih krama desa.
- (3) Tan wenang angge Pamangku luire:
  - ha. Ceda angga, luire: peceng, perot, cungh lan sapenunggilannya.
  - na. Sakit ila, ayan, buduh, miwah sakit tan sida katambanin.
  - ca. Sane madrebe parilaksana tan becik.
  - ra. Sang sapisira ugi sane tan kapatutang, manut pararem.
- (4) Prebea kapamangkuan:
  - ha. Ngwentenang pamangku kamedalin saha kalaksanayang antuk sang ngadegang, makadi krama desa utawi pangempon pura soang-soang.
  - na. Yening wenten pamangku adat sane mantuk, indik pitra yadnyannyane dados swadharman krama adat lan kulawargannyane.
- (5) Pamangku patut ngamagehang sesana miwah agem-ageman pamangku.

Pawos 35

- (1) Swadharman pamangku luire:
  - ha. Ngenterang upakara piodalan ring kahyangan utawi ring soang-soang pakubon krama.
  - na. Tan wenang salab sulub. Yan mamurug patut pamangku inucap nyepuhin raga.

- ca. Prade silih sinunggil pamangku kapialang utawi cuntaka dados nyelang pamangku siosan ring Kahyangan Tiga inucap.
- ra. Samalih yan sampun pamangku ngayah tigang rahina ring pura, kancit wenten kulawarganyane, utawi pisaga lan pangarep lina, pamangku inucap tan keneng cuntaka, sakewanten pamangku inucap tan budal salami piodalan.

(2) Petias utawi olih-olihan pamangku luire:

- ha. Luput ayahan pakaryan lan pepeson ring banjar muang desa.
- na. Sarin canang sane kaatur ring pura.
- ca. Panyolasan / pacatu saka sidan antuk desa.

#### Pawos 36

(1) Pamangku kagentosan riantukan:

- ha. Lina.
- na. Pinunas ngraga, menawi kageringan lan sapenunggalannya.
- ca. Karariang antuk krama menawi malaksana sane tan patut (asta dusta).

(2) Prade pamangku karariang sangkaning malaksana asta dusta, kakeninin pamidanda manut pararem.

#### Pawos 37

(1) Manut kasukertan kahyangan, sane nenten kalugrayang ngranjing ka pura ring desa luire sang katiben cuntaka inggian punika:

- ha. Sebel kandel, ngraja swala salami durung mabersih.
- na. Sebel ngembasang putera, utawi karuron sajeroning 42 rahina.
- ca. Sebel pangantenan, sadurung mabiakala.
- ra. Cuntaka sangkaning kalayu sekaran manut senger.
- ka. Anak alit sadurunge mayusa tigang sasih.

- da. Sang panten miwah anak bebinjat sadurung maupakara.
  - ta. Makta sahananing sane kasinanggeh ngletehin.
  - sa. Wewalungan suku pat, sajawaning ritatkala mapepada.
  - wa. Mabusana sane tan manut kadi tata caraning ngranjing ka pura.
  - la. Sadurung polih wak-wakan (pituduh) prajuru desa adat.
- (2) Busana ngranjing ka pura wenang nganutin dresta minakadi:
- ha. Ritatkala ngaturang ayah, mawastra miwah nylempot.
  - na. Ritatkala ngaturang sembah, mabusana jangkep.
  - ca. Siosan kadi ring arep nenten kalugra, sajawaning sampun pituduh prajuru desa.
- (3) Parilaksana sane tan kawenangang ring pura, luire:
- ha. Mabawos sane kasinanggeh wak parusya, wak capala.
  - na. Makoratan / mabacin, mawarih, masanggama.
  - ca. Masumpah utawi macoran, sajawaning pituduh prajuru desa.
  - ra. Ngias raga sajawaning pandita miwah pinandita.
  - ka. Munggh tedun palinggih sajawaning pituduh prajuru desa.
- (4) Sang mamurug kadi kecape ring arep, keni pamidanda pamrayascita sapatutnyane.
- (5) Ritatkala wenten krama desa pacang nangun karya luire, piodalan padudusan lan nyekah mangdane masadok ring prajuru desa.

#### Pawos 38

- (1) Yan wenten jadma karawuhan ring pura, kengin patut katatasang, prade rumasa kasumangsan sayan yan tan wiakti, jadma inucap kasisipang manut pararem.
- (2) Prade kahyangan kahanan durmanggala, minakadi kapanca bhaya, pamangku patut digelis nyadokang ring prajuru mangda marumang krama desa tur ngwentenang upacara sapatutnyane.

## PALET 2

### INDIK RESI YADNYA

#### Pawos 39

- (1) Sang pacang madeg pandita utawi madwijati patut masadok ring prajuru desa kalih Parisadha Hindu Dharma Indonesia.
- (2) Prajuru desa patut netesang tur ngalengin, prade wenten kacihnan lempas ring kecap miwah dresta.
- (3) Sang Dwijati polih leluputan ayahan lan pepeson sane kaanggehang antuk desa.

#### Pawos 40

- (1) Sang Sulinggih patut ngriyining muput yadnya ring wewidangan desa, sasampune punika wawu muputang yadnya ka jebar jagat utawi ka dura desa.
- (2) Krama desa sami patut sareng nitenin katuntun antuk prajuru, mangda sahananing yadnya sane kawentenang kaicen pamuput olih pandita utawi pamangku Kahyangan Tiga manut dudonan upakara.

## PALET 3

### Indik Pitra Yadnya

#### Pawos 41

- (1) Dudonan pamargin pangupakaran sang lina:
  - ha. Antuk mendem utawi ngeseng, makacihna pakingsan ring geni utawi ring Ibu Pertiwi, salami nuptupang prabea.
  - na. Maupacara pangabenan utawi palebon.
- (2) Upacara-upaca pitra yadnya riwusan kaabenang mawastu raris mamukur tur kalanturang nglinggihang dewa pitara.

- (3) Saluiring upacara pitra yadnya sane kamargiang olih silih sinunggil wargi krama desa mangda kasadokang ring prajuru banjar muang desa tur nunas tetimbangan ring kawentenannyane.

Pawos 42

- (1) Swadarman lan tetegenan prade wenten krama sinalih tunggil warga lina.  
Sang kaduhkitan patut:
- ha. Nyadokang ring prajuru banjar tur nyarengin nunasang ring prajuru desa nunas tetimbang ring kawentenannyane.
  - na. Ngaturin Banjar mangda makarya eteh-ete sawa kadulurin panyembrama antuk canang tetukon.
- (2) Swadharmaning Banjar:
- ha. Prajuru Banjar maritetes pamargin sang kaduhkitan, napike pacang kapendem, makingsan riyin utawi nglantur kaabenang.
  - na. Prade sampun pastika, raris kawentenang pasuaran kulkul pinaka ceciren manut sakadi pasuaran kulkul indik kapatian (lina) antuk Prajuru Banjar.
  - ca. Panyanggran Banjar salanturnyane: soang-soang Krama Banjar nedunang patus manut pararem, ngaryanin eteh-ete sawa, nyiramang layon mangda tan nglintangin ring rahina duk sampun kajantenang lina, krama Banjar maka sami nganter sang lina ka setra gumanti mangda trepti jantos papendeman puput, tan kengin nglelet langkungan ring 7 (pitung) rahina, tur patut polih gebagan anut paitungan Prajuru Banjar, tan kalugra nyekeh layon langkungan ring a warsa, tan kalugra nginepang bangbang.
- (3) Prade wenten lina rikala piodalan ring pura, indik ngutang sawa utawi ngeseng mangda ngelingang indik makadi ring sor:
- ha. Odalan jagat utawi odalan kahyangan tiga tan wenang.

- na. Tigang rahina magpag odalan ring Kahyangan Tiga tan wenang nyuarayang kulkul indik kapatian, yen jagi ngutang mendem pamargine mangda nyilib.
  - ca. Yening sasengker tigang rahina magpag odalan ring Kahyangan Tiga, silih sinunggil krama banjar panyatusan sane polih nyanggra piodalan punika katibenin antaka, sang lina punika mangda kasirepang dumun.
  - ra. Nemoning prawani, purnama, tilem, kala gotongan, semut sadulur tan wenang mendem sawa utawi ngaben.
  - ka. Makirim wangke (yan mangkin mendem, benjang ngeseng, yadin mangkin ngeseng, benjang mendem, mangkin ngeseng benjang ngeseng, mangkin mendem, benjang mendem) nglangkar watangan nenten wenang. Nanging yening malelet sane kalangkar kawenangang.
- (4) Pamargin pamendeman utawi palebonan mangda nganutin sastra agama lan dresta.
- (5) Pamargin sang lina ka setra mangda nganutin catus pataning desa, yening wenten krama desa sane lina lintangan ring adiri.

#### Pawos 43

- (1) Sane kasinanggeh kacuntakan sakadi ring sor:
- ha. Cuntaka antuk lina.
  - na. Cuntaka antuk ngraja swala.
  - ca. Cuntaka antuk ngembasang putra.
  - ra. Cuntaka antuk karuron.
  - ka. Cuntaka antuk pawiwahan.
  - da. Cuntaka antuk gamia gemana.
  - ta. Cuntaka antuk mamitra ngalang.
  - sa. Cuntaka antuk salah timpal.
  - wa. Cuntaka antuk yening wenten anak istri mobot nenten kaupakarain pabea kaonan tur pawidi widanan.

(2) Sengker cuntaka manut kawentenannya:

- ha. Cuntaka kalayu sekaran (lina), cuntakannyane nyantos masesepuh manut dresta.
- na. Cuntaka ngraja swala, 3 rahina ngawit saking ngraja swala utawi salaminnyane ngraja swala.
- ca. Cuntaka ngembasang putra masengker a bulan pitung dina (42 rahina), ngawit saking putrane embas utawi nyantos sampun tutug upakara makambuhan tur maprayascita manut sakadi agama.
- ra. Cuntaka karuron kasengker a bulan pitung dina (42 rahina) tur sampun maprayascita.
- ka. Cuntaka pawiwahan, cuntakannyane nyantos sasampune maupakara makalan-kalan.
- da. Cuntaka gamia gemana cuntakannyane nyantos sasampune kapalasang tur sampun kawentenang pamrayascita raga, tur sampun kawentenang pamrayascita desa adat / kahyangan.
- ta. Cuntaka antuk mamitra ngalang, cuntakannyane nyantos sampun kawentenang upakara pabiakaonan, pamrayascita.
- sa. Cuntaka antuk salah timpal, kapuputang sakadi ring agama Hindu miwah dresta adat.
- wa. Cuntaka antuk anak istri mobot, sangkaning lokika sanggraha nenten kawentenang upakara pabiakaonan, cuntakannyane sasampune wenten upakara pabiakaonan.
- la. Ngembas putra nenten kawentenang upakara pawidi-widanan, cuntakannyane nyantos wenten sane meras sang putra tur sasampune kawentenang upakara sakadi pawarah-warrah agama Hindu.

(3) Cuntaka kalayu sekaran utawi lina:

- ha. Kapendem cuntakannyane: cuntaka / sebel banjar masenger ngatelunang (3 rahina) duk pamendeman sawa utawi sasampune polih pamrayascita (masepuh), cuntaka kulawargannyane sajeroning palemahan manut dresta.
- na. Kaabenang cuntakannyane: sang nyambut pitra yadnya cuntakannyane ngawit saking ngrancang karya rawuh riwusan yadnyannyane (mapepegatan).
- (4) Tan keneng cuntaka luire:
- ha. Sang maraga sulinggih.
- na. Pamangku Kahyangan Tiga rikala piodalan.

#### Pawos 44

- (1) Atiwa-tiwa utawi pangabenan kamargiang madasar antuk sastra agama miwah dresta.
- (2) Krama sane pacang ngamargiang upakara atiwa-tiwa utawi pangabenan patut masadok ring prajuru banjar taler ring prajuru desa.
- (3) Prade akeh reramon makadi, patulangan, wadah sane kabakta katunon patut masadok ring prajuru desa, yening jagi nunas patulung puyung desa.

#### PALET 4

### INDIK MANUSA YADNYA

#### Pawos 45

- (1) Manusa yadnya inggih punika upacara-upacara dharmaning kahuripan manusa ngawit saking patemoning kama bang kalawan kama petak sajeroning garba, nyantos kalayu sekaran riwekas.
- (2) Upacara inucap kadi ring ajeng madudonan sakadi ring sor:
- ha. Magedong-gedongan duk pangrempinian i biang.
- na. Duk sang rare medal.
- ca. Kepus udel.

- ra. Roras rahina.
  - ka. Tutug kambuhan (abulan pitung dina / 42 rahina).
  - da. Tigang sasih (telu bulan / 105 rahina).
  - ta. Pawetuan / otonan / odalan (nem sasih / 210 rahina).
  - sa. Tutug kelih (ngraja swala sane wadon, ngraja singa sane lanang).
  - wa. Matatah / mapandes.
  - la. Pawiwahan (grehastha asrama).
  - ma. Mawinten.
- (3) Upacara-upacara inucap kamargiang nista, madya, utama manut sastra agama miwah dresta.

#### PALET 5

### INDIK BUTHA YADNYA

#### Pawos 46

- (1) Butha yadnya inggih punika upacara-upacara marupa byakala, caru, labaan, aci lan pakelem miwah sane siosan.
- (2) Upacara pabeakala ring Pertiwi, Kahyangan lan bebhutan kawastanin macaru.
- (3) Pacaruan inucap ring ajeng nista, madya, utama, manut wiguna kadi ring sor:
  - ha. Eka sata.
  - na. Panca sata.
  - ca. Panca sanak.
  - ra. Resi gana.
  - ka. Panca kelud.
  - da. Tawur.
- (4) Sajawaning sakadi inucap ring ajeng taler kawentenang upacara:

- ha. Mabanten utawi jotan, saiban wusan maratengan.
- na. Masepuh-sepuh rikala pacang wenten wali ring pura.

#### Pawos 47

(1) Pangupahayu desa antuk caru nangluk mrana, kalaksanayang ring tepening Tilem sasih Kenem. Dudonane makadi:

ha. Ring madya catus pataning desa muang ring soang-soang wates catus pataning desa makadi: purwa, daksina, pascima, muang utara mangda nanceb sanggar agung madaging kayu tulak lan kober poleng saha upakara sakadi:

1. Ring wates kangin catus pataning desa caru ayam putih muang runtutannyane.
2. Ring wates kelod catus pataning desa caru ayam biying muang runtutannyane.
3. Ring wates kauh catus pataning desa caru ayam putih siungan lan kucit butuan muang runtutannyane.
4. Ring wates kaja catus pataning desa caru ayam selem lan kucit butuan muang runtutannyane.
5. Ring madyaning catus pataning desa caru ayam brumbun lan kucit butuan saha runtutannyane.
6. Ring soang-soang sanggar agung aturan sane mungguh: canang, pasucian, peras, sodan, suci, daksina, tumpeng selem, barak, pada madanan, maulam saka luire mapanggang, saha ring natar, segehan agung, segehan putih kuning, segehan cacah pitung tanding, segehan warna lima maulam jejeron matah, cemeng madaging yeh, tuak, arak, berem wiadin tetabuhannyane, ngayat bhatara ring Gunung Agung kalih mapaweweh ring Kala Semaya.

na. Ring soang-soang lebu nanceb sanggah cucuk madaging kober poleng saha upakara sane munggah, canang maraka, tumpeng barak ulam mapanggang, segehan putih, segehan cacah 5 tanding maulam jejeron matah, tabuhan arak berem nyambat Kala Semaya.

#### Pawos 48

- (1) Nangken ngawarsa rikala Tilem Kasanga kawentenang pangupahayu jagat utawi caru tawur Tilem sasih Kasanga, kalaksanayang ring catus pataning desa, maserana antuk caru Panca Sata.
- (2) Ring banjar soang-soang kalaksanayang antuk caru Eka Sata, taler krama banjar ngaturang banten prani.
- (3) Ring soang-soang lebu nanceb sanggah tutuan saha banten luire:
  - ha. Sane munggah peras, sodan, daksina, tumpeng ketan, sayur kacang rintu, kacang panjang, katipat a kelan, sujang madaging tuak, arak berem, magantung ring sanggah tutuan.
  - na. Segehan agung, segehan manca warna 9 tanding, maulam olahannyane ayam brumbun tetabuhan yeh tuak, raka muah berem.
  - ca. Ring natar mrajan segehan nasi cacah satus kutus tanding maulam jejeroan matah ngayat sang Bhuta Raja lan Sang Kala Raja.
  - ra. Sasampune sandya kala kalanturang antuk Ngrupuk.
- (4) Rikala Nyepi, brata panyepian sane kamargiang antuk krama desa luire:
  - ha. Amati geni: tan dados maapi-api.
  - na. Amati karya: tan dados nyambut karya.
  - ca. Amati lelanguan: tan dados malila arsa, maoneng-onengan, masuara gora lan sapanunggalannyane.
  - ra. Amati lelungan: tan dados malelungan.

- (5) Pabratan inucap kamargiang saking semeng nyantos ngedas lemah benjangne.
- (6) Sang mamurug kecaping ajeng keni pamidanda manut pararem ring banjar / tempek soang-soang kamargiang antuk patilik (pacalang desa).
- (7) Riwus panyepian benjangne ring rahina pangembak geni maka cihna pangawit Isaka Warsa, soang-soang warga desa sami patut saling ngaksama (darma santi) / sima krama.

PANCAMAS SARGAH  
**SUKERTA TATA PAWONGAN**

PALET 1

**INDIK PAWIWAHAN**

Pawos 48

- (1) Pawiwahan inggih punika patemoning purusa predana, malarapan panunggalan kayun suka cita kadulurin upasaksi sekala-niskala.
- (2) Pamargin pawiwahan luire:
  - ha. Pepadikan, kamanggala antuk pakrunan.
  - na. Ngrorod, marangkat riyin wawu kakrunayang / panglukuan.
  - ca. Nyeburin utawi nyentana, nyeburin risampun kamanggalan antuk upacara pamerasan.
- (3) Pidabdab sang pacang mawiwaha patut:
  - ha. Sampun manggeh daha-teruna.
  - na. Sangkaning pada lila (tan kapaksa).
  - ca. Kamargiang sudiwadani prade pangambilan tios agama.
- (4) Pamargin pawiwahan mangda nganutin Undang-undang Perkawinan saking Sang Ngawewenang.

## Pawos 49

- (1) Pawiwahan sane kapatutang ring desa sakadi ring sor:
  - ha. Sampun kamargiang pakalan-kalan lan widiwidana kasaksinin antuk tri upasaksi inggih punika manusa saksi, bhuta saksi lan dewa saksi.
  - na. Prajuru patut mapakelingang lan ngilikitayang pawiwahan.
- (2) Pawiwahan sane tan manut kadi ring ajeng sinanggeh tan pastika.

## Pawos 50

- (1) Tata caraning parabian:
  - ha. Sapa sira ugi pacang ngwarangang pakulawargan patut masadok ring prajuru.
  - na. Salanturnyane prajuru maritatasang, manut tan manut indik parabiane.
- (2) Pamargin pepadikan manut dudonan:
  - ha. Sang sane mamadik patut masadok ring guru rupaka sane kapadik.
  - na. Rikala pamadikan sang mamadik pamekas malarapan antuk sedah woh ring sane kapadik.
  - ca. Risedek pangambilan patut kasaksiang oleh manggala adat lan manggala praja.
  - ra. Risampun pragat raris sang istri kaajak budal ring pakubon sang lanang, saha kalanturang antuk mabeakala.
  - ka. Mangda pragat tumus sekala niskala, raris kulawarga purusa majauman makta pajati ring mrajan wadone, makacihna puput tumus sekala niskala.
- (3) Prade ngorod utawi mrangkat patut:
  - ha. Reraman lanange ngwentenang panglukuan / pajati antuk duta saksi paling kedik 2 (kalih) diri.
  - na. Malarapan antuk sewalapatra kadasarin kapitresnan ipun maka kalih tur kasaksinin olih manggala adat lan praja.

- ca. Prade tan katrima panglukuan / pajati pakrunan kamargiang jantos ping tiga, parabian sampun dados kamargiang.
  - ra. Pangaskara patebasan pabeakala.
  - ka. Majauman sekala niskala.
- (4) Sajeroning pakrunan / panglukuan patut:
- ha. Kamanggala saking kramerena purusa antuk pangaksama majeng ring kramerena pradanane.
  - na. Kaigumang bawos indik idih pakidih, utawi palegayan arep ring pasewakan sang ngidih saha dewasa pakrabkambeyane kawekas.
  - ca. Kacihnayang indik kapurusa utawi prade sentana rajeg kajejerang kapatutang ngidih anak lanang sane kabawos pawiwahan nyeburin tur risampun sulur pamerasan kategepin kamanggehang sentana nyeburin.
- (5) Pawiwahan mapiteges upacara galang apadang (patut) mapikuren duaning sampun manut sakadi dudonannyane manut sastra agama lan dresta.

## PALET 2

### INDIK NYAPIAN

#### Pawos 51

- (1) Pawiwahan praside kawusang malarapan antuk salah sinunggil lina, mapiteges balu, makadi balu lanang utawi istri.
- (2) Sang palas marabian patut masadok ring prajuru banjarnyane.
- (3) Kadulurin antuk rerepi pastika, ngeninin sapari indik palasnyane.
- (4) Palas parabiane sane patut kasadokang inucap ring ajeng inggih punika palase sane sampun puput bawos / dresta / pamutus bawos saking guruwisesa (pengadilan).

- (5) Prade sane kasadokang durung marupa palas sane pastika, patut prajuru banjare nuntun mangda sulur bawose kapatutang riyin.
- (6) Palas parabiane, sang lanang patut ngamargiang upakara pajati / masamsam / widiwadani ring pura bale banjar.
- (7) Mapamit saking mrajan sang lanang.
- (8) Prade riwekas sang palas marabian kacihna adung malih patut, ngamanggehang pawiwahan malih.

### PALET 3

## INDIK SENTANA

### Pawos 52

- (1) Sentana wenten kalih pawos, sane kaucap preti sentana miwah sentana peperasan.
- (2) Preti sentana inggih punika, sentana sane metu saking pawiwahan kapatut.
- (3) Prade pawiwahan tan ngwetuang sentana, kengin ngidih sentana antuk upasaksi sekala-niskala sane kawastanin sentana peperasan.
- (4) Prade pawiwahan tan kapatut ngwetuang sentana, mangda tan kantung kawastanin panak bebinjat utawi astra, patut kamanggala antuk panyangaskara.
- (5) Sentana rajeg inggih punika, prati sentana wadon, (pradana) sane kamanggehang lanang (purusa) tur risampun nglaksanayang pawiwahan nyeburin.
- (6) Sang sane kaarsayang sentana rajeg inucap inggih punika:
  - ha. Prati sentana wadon tunggal utawi salah sinunggil prati sentana wadon yaning makasami prati sentana wadon.
  - na. Pawiwahan kaceburin, kautamayang antuk jadma sane maagama Hindu utawi jadma sane maagama siosan sane sampun nglaksanayang pamarisuda raga utawi sudi wadani.

ca. Sane ngamanggehang sentana rajeg patut masadok ring prajuru Banjar tur kelihan Banjar patut nyiarang ring banjar saha ngaturang ring prajuru desa adat.

#### Pawos 53

- (1) Ngamanggehang sentana manut dudonan patut makacihna arta brana pamerasan sane kasaksiang sekala-niskala.
- (2) Sapa sira ugi krama pacang ngidih sentana, patut masadok ring Prajuru Banjar sanistane asasih sadereng pamerasan.
- (3) Bendesa kawakilin antuk kelian-kelian Banjar nyiarang ring sawewidangan desa. Sang sapa sire ugi rumasa tan lila, mangda nguningang masengker kalih wuku sadurung pamerasan ring Bendesa Adat.
- (4) Prajuru desa digelis mawosin saha ngicenin pamutus nepek ring catur dresta miwah pararem.
- (5) Prade sulur paperasan tan manut ring kecaping ajeng, prajuru banjar / prajuru desa wenang ngandeg sang pacang makarya, saha ngicenin pamutus, mangda kapuputang riyin bebawosan sulur utawi wicarannya.

#### Pawos 54

- (1) Peperasan sane kapatutang ring desa risampun makacihna:
  - ha. Widiwadani pamerasan.
  - na. Kasaksinin antuk prajuru desa sane makelingang utawi ngilikitayang.
  - ca. Kasiarang ring wewidangan desane.
- (2) Sane kapatut peras angge sentana kadi ring sor:
  - ha. Jadma maagama Hindu, jadma tios agama kamanggala antuk upacara sudiwadani

- na. Sinalih tunggil mawiwit saking kulawarga tunggal sanggah utawi mrajan, paibon lan dadia utawi anak tios sakewanten sang maagama Hindu.
  - ca. Kautamayang saking waris pancer kapurusa.
  - ra. Kulawarga saking purusa, prade tan wenten kengin saking wadon yening taler tan wenten wawu kengin sakama-kama (sakita kayun).
- (3) Kengin ngangkat sentana langkung ring adiri, lanang wiadin wadon, patut ngamargiang tata titi upacara pamerasan sakadi ring ajeng.

#### PALET 4

### INDIK WARISAN

#### Pawos 55

- (1) Warisan inggih punika arta brana saha tetamian sekala-niskala saking kaluhurannya marep ring tetamiannya.
- (2) Ikang sinanggeh warisan luire:
  - ha. Due tengah, sanggah / mrajan, pusaka lan sane siosan.
  - na. Pagunakayan, tadtadan / jiwa dana, hutang piutang.
- (3) Wawu kengin kabawos warisan prade wenten:
  - ha. Sang ngwarisang.
  - na. Katurunan (ahli waris)
  - ca. Arta brana, tetegenan (ayah-ayahan) makacihna warisan.

#### Pawos 56

- (1) Ahli waris, luire:
  - ha. Pratisentana purusa.
  - na. Pratisentana (sentana rajeg).
  - ca. Sentana paperasan lanang / wadon.

- (2) Prade tan wenten sakadi ring ajeng, kang sinanggeh ahli waris.
- ha. Turunan purusa ngunggahang, makadi rerama misan, mindon.
  - na. Turunan purusa kasamping makadi kaponakan, kaponakan dimisan, miwah kaponakan dimindon.
- (3) Swadarmaning ahli waris patut:
- ha. Ngupapira pawaris duk kantun maurip.
  - na. Nerima saha ngwasayang tetamian pahan kaluhurannya, makadi ngrempon sanggah / mrajan, pura saha pangupakaryanang miwah ayah-ayahan pawaris.
  - ca. Ngabenang pawaris saha nglanturang upacara pitra yadnya.
  - ra. Naurin hutang-hutang pawaris manut panglokika.

#### Pawos 57

- (1) Risampun kalaksanayang pitra yadnya lan hutang-hutang pawaris buntas katawur, wawu warisan dados kepah.
- (2) Para ahli waris sami polih pahan sangkaning pagunakaya.
- (3) Sinalih tunggil ahli waris kengin tan polih pahan prade:
- ha. Nilar kawitan lan sesannaing agama Hindu.
  - na. Alpaka guru.
  - ca. Sentana rajeg kesah mawiwaha utawi pretisentana nyeburin soang-soang kabawos ninggal kedaton.
- (4) Boya ahli waris, kengin muponin pikolih manut dudonan luire:
- ha. Sentana luh, salami durung kesah mawiwaha.
  - na. Balu luh wiadin muani nyeburin (soang-soang boya sentana).
- (5) Pawaris kengin maweweh rikala maurip pinaka jiwa dana, tadtadan bekel makacihna paweweh ring oka sane kesah mawiwaha.

- (1) Prade sajeroning pakulawargan wenten ahli waris langkungan ring adiri patut:
  - ha. Kawentenang paigum indik pahan inucap.
  - na. Yan tan prasida, katunasang tetimbang ring paigum banjar.
  - ca. Prade taler tan wenten cumpu ring panepas prajuru, patut kadauhang ring prajuru desa, prade taler tan kacumpuin, kengin katunasang ring sang rumawos (Pengadilan Negeri).

SAT SARGAH

WICARA LAN PAMIDANDA

PALET I

INDIK WICARA

- (1) Sane wenang mawosin makadi mutusang wicara ring desa inggih punika prajuru desa manggeh paruman desa.
  - ha. Kelihan Banjar pradene sang mawicara sane patunggalan banjar.
  - na. Bendesa Adat, sang mawicara sane sami-sami ring patunggalan desa adat.
- (2) Tata dudonan mawosin, saha muputang wicara warga desa kadi ring sor:
  - ha. Kaping ajeng kabaosin antuk Kelihan Banjar.
  - na. Tan cumpu ring panepas Kelihan Banjar katunasang ring panglingsir banjar.
  - ca. Panglingsir banjar, tan kacumponin katedunang ring pasamuan banjar.
  - ra. Paruman banjar tan kanutin kengin nunasang ring Bendesa Adat.
  - ka. Bendesa Adat tan prasida muputang katincepang ring paruman desa.

- (1) Sahanan wicara mawiwit kacorahan saka luwire sinanggeh nungkasin daging awig-awig, pasuaran miwah pararem desa utawi banjar, prajuru desa patut digelis mawosin tan nyantos pasadok.
- (2) Sajaba wicara kadi ring ajeng patut nyantosang pasadok sang nunas bawos.
- (3) Panepase patut pastika nyantenang iwang patut malarapan tri premana (saksi, lekita, bukti) miwah tan maren nepek ring catur dresta.

PALET 2

**INDIK PAMIDANDA**

Pawos 61

- (1) Desa utawi banjar wenang niwakang pamidanda ring warga desa utawi banjar sane sisip.
- (2) Paniwak inucap, kamargiang olih Bendesa utawi Kelihan Banjar.
- (3) Bacakan pamidanda, luire:
  - ha. Danda arta (dosa, dande saha panikel-panikelannya miwah panikel-panikel urunan)
  - na. Kawusang makrama, kawaliang pipil nyane.
  - ca. Panyangaskara.
- (4) Pamidanda sane katiwakang patut mesor singgih manut ring kasisipane utamannya ngamanggehang kasudamalan desa.
- (5) Jinah utawi raja brana pamidanda, ngranjing dados drue desa utawi banjar.

SAPTAMAS SARGAH

**NGUWAH NGUWUHIN AWIG-AWIG**

Pawos 62

- (1) Nguwah nguwuhin awig-awig desa puniki kamargiang olih paruman desa.
- (2) Paruman inucap mangda kadasarin antuk pakarsan krama desa adat yadiastun kamedalang antuk prajuru sinunggal wiadin sinarengan.

Pawos 63

- (1) Sakaluring sane wenten saderengnya patut kaanutang ring sadaging awig-awig puniki.
- (2) Sakaluring sane durung kabawos sajeroning awig-awig puniki patut kamargiang manut tata cara sane sampun ketah mamargi kadulurin antuk pararem-pararem.

- ASTAMAS SARGAH

**SAMAPTA / PAMUPUT**

Pawos 64

- (1) Awig-awig puniki kawastanin Awig-awig Desa Adat Sesetan.
- ~~(2) Awig-awig puniki kamargiang ngawit kaingkupan utawi kararemin.~~

Pawos 65

- (1) Awig-awig puniki kasungkemin ring paruman duk rahina Wrespati tanggal ping 15 sasih Kasa Isaka, warsa 1924, tanggal 8 Agustus 2002 Masehi, ring Wantilan Astina Desa Sesetan.

- (2) Awig-Awig puniki kalingga tanganin antuk Bendesa, kasarengin Kelihan-  
Kelihan Banjar, saha kasaksinin antuk Lurah miwah Kepala Lingkungan  
sawewidangan desa, saha kakukuhang antuk Walikota Denpasar.
- (3) Luwir sang nglingga tanganin:

1) Kapertama Prajuru Desa lan Banjar:  
Bendesa Adat Sesetan,



(KETUT GEĐE YUDISTIRA)



na. Kelihan Banjar Kaja

(NYOMAN PUTRA ADNYANA, SH.)



ca. Kelihan Banjar Tengah

(A.A.MADE WIJAYA, SH..)



ra. Kelihan Banjar Pembungan

(WAYAN SUKARDA)



ka. Kelihan Banjar Gaduh

(MADE WIDANA)



ta. Kelihan Banjar Lantang Bejuh

(DR. R. A. P. SURYAWAN, M.Sc.)



ta. Kelihan Banjar Dukuh Sari

(I MADE SUDANA)



sa. Kelihan Banjar Pegok

(DRS. WAYAN SUWENA)




wa. Kelihan Banjar Suwung BK

(DRS. KETUT DARNA)

1a. Kelihan Banjar Puri Agung



(DRS. I GST. MADE SUDJENDRA)



2) Kaping kalih Prajuru Dinas miaka saksi :

2) Kaping kalih Prajuru Dinas miaka saksi :



(BAGUS PUTU SEMARA, SE.)



(KETUT SUPARJAYA, S.Ag)

ca. Kaling Banjar Pembungan



(BAGUS PUTU GARA)



(WAYAN BUDIARSA)

Kaling Banjar Gaduh



(WAYAN SUKADA)

da Kaling Banjar Puri Agung



(I GST. MADE ANTARA, SH)

ca. Kaling Banjar Lantang Bejuh



(DRS. I MADE JONIARSA)



(IR. KETUT DUGDUG)

wa. Kaling Banjar Taman Suci



(NYOMAN CITRA)

ca. Kaling Banjar Taman Sari




(EDDY SUTIKNO)


ma. Kaling Banjar Suwung Batan Kendal

  
(NYOMAN SARMA)

ga. Kaling Banjar.Karya Darma

  
(GEDE ADDY ARTANA)

ba. Kepala Kelurahan Sasetan

  
(I MADE SUMARSANA, SE.)

3)Wali Kota Denpasar, maka murdhaning pamikukuh

( DRS. A. A. PUSPAYOGA )

Mengetahui, dan telah dicatatkan : .....

Tanggal : .....

Reg. Nomor : .....